

## «Неча пул экан?»



10:07 / 30.10.2018 4206

Маслама ибн Абдулмалик Умар ибн Абдулазизнинг ҳузурига келди. Унинг эғнида Миср чойшабидан кийим бор эди. Халифа Умар ибн Абдулазиз сўради:

- Буни неча пулга олдинг, Абу Саъид?

Маслама унинг нарҳини айтди.

Шунда халифа деди:

- Нарҳини бир оз туширсанг обрўйинг камайиб қолармиди?

Маслам:

- Йўқ.

Халифа:

- Нархига яна қўшиб берсанг, обрўйинг кўтарилиб қолармиди?

Маслама:

- Йўқ.

Халифа:

- Билиб қўй, Маслама, савдолашишнинг афзали бадавлат бўла туриб савдолашишдир. Кечиришнинг афзали жазолашга қодир бўла туриб кечиришдир. Мулойимликнинг афзали волий (ҳоким) бўлганидан кейинги мулойимликдир.

### **Чинакам инсонлар**

Ибн Муборак билан Суфён Саврий ўртасида шундай савол-жавоб бўлиб ўтган экан:

- Чинакам инсонлар кимлар?

- Уламолар

- Кимлар чинакам шарафли?

- Тақводорлар.

- Чинакам подшоҳлар кимлар?

- Парҳезкорлар.

- Чинакам омилар кимлар?

- Гап билан одамларнинг пулини оладиган қиссагўйлар.

- Чинакам пасткашлар кимлар?

- Золимлар.

**Ҳоний ал Ҳаж**

**“Солиҳлар гулшани” китобидан**